


黔

記





黔

記

李宗昉 著

中
華
書
局

26367

叢書集成初編

黔記

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

黔
記

此據問影樓輿地叢
書本排印初編各叢
書僅有此本

嘉慶十八年。今少宰山陽李公。以贊善督學黔中。時巡撫某公。以黔中地非甚寡。糧數乃不敵一二縣於江蘇。疑士民田多隱匿。擬奏請全省丈量田。公聞之。駭甚。而無說以折之也。而某公自以不加賦。而田得增多。賦倍出。爲

國家計久長。意自得。銳甚。時時籌經費。調屬吏。議設官局事。奏請卽行。有日矣。公初至黔。時以黔中文獻隱失。府縣志多缺不修。無以稱

聖天子一道德廣文思之意。乃檄各學校官。訪鄉士大夫。藏金石圖史歌謠志乘涉黔事者。最上學使。鈔錄發還。而遂得錄御史包祚永丈田奏。蓋乾隆初。貴州學使鄒一桂請丈田。而包公駁之。得

俞旨。公得此奏。則大喜。示某公曰。丈田議。學臣嘗奏之。駁不行。今公發之。必援前議解其駁。議乃得申。不然。部議必駁公。如曩時。且以匿前駁不奏。詰公。即公無辭。某公見奏。驚曰。吾不意害乃如是。非包君黔人。固無由知。請勿復言丈田事。立廢局。罷所調吏。後他巡撫來。以事遠。文書多遺失。恐後萌芽。故列上其事。而公爲少司徒。乃得援前議。詳復之。事定不行。方公檄學官上人家所藏書。惟網羅放失舊聞。將編爲黔記。補田侍郎贈書之缺而已。而遂得包御史奏。以同某公之意。以安黔中之民。不然。黔中固多山。少平地。民或以虛占不毛之土。而實奪其可耕之田。又以胥吏上下之手。而丈其高下不可準之地。使賄成於胥吏。民財耗。而官田不增。其害小。苟民田奪。而官田遂增。惟剝其膚髓。爲

國家經常之規。則一朝而伏萬世之憂。不難矣。而黔之民。得至今宴然無憂。非公之功哉。此一事也。於是

書足千古矣。若夫鉅細悉備，裨益雅俗，有華陽志風土記之遺風。覽是書者，當自得之，而有取焉。道光十四年甲午二月，門下士上元梅曾亮謹序。

黔記卷一

清 山陽李宗昉芝齡著

貴州通志。近今八九十年。未加增葺。以今所見聞考之。纔十得四五耳。余歷試六郡。惟興義府。見南龍舊志刊本二卷。亦多缺略。草志則有平越府志。已缺一卷。餘惟安順之安平。興義之安南。有草稿數冊。仍抄撮通志。殊無新得。荒略如此。考古者。將何所徵信焉。

省城外。東南近城垣。新建君子亭。爲陽明也。海昌沈文學毓蓀。號蘋濱。字于潤。僑金筑。能詩。其謁王文成公祠曰。荒涼祠宇對斜曛。儒術千秋大雅羣。朱陸之間分一席。孫吳而外有三軍。牂州古驛生春草。越國青山隔暮雲。當日龍場曾瘞旅。他鄉誰忍讀遺文。旅店曉起云。荒城一夕小淹留。喔喔晨雞動客愁。五夜霜風消宿酒。四山煙瘴壓征裘。清衙此去依嚴武。逆旅何人識馬周。閨裏金錢如問卜。春分前已過思州。

沔陽張蓮濤錫穀。署開泰縣令。有秀才薛上國。素不至縣廷。忽通謁。長跪而泣。問何爲。對以徑來一瞻好官。越日上國死。懷手書遺子姪。戒毋爲不善。中曰。縣公清廉寡欲。其後必有達人。所藏張鴻臚銅雀瓦硯。可持贈公子。勸其學。蓮濤受其硯。以名其齋。早熟稻名蟬鳴。俗呼早市香。

雞窠所生。下有白蟻聚土如蜂房。又名蟻奪采。時人必踰來歲可再得。立則否。羊肚菌亦生細草中。刺梨野生。幹如蒺藜。土人多種于籬落。可辟猛獸。其花如茶蘼。結實如小榴。色黃多刺。味甘微酸。小兒食之。消積滯。搗汁入蜜。煉之可爲膏。各郡皆產。越黔境乃無。又一種重胎豔花。紅紫間色。可蒔爲玩。名送春歸。或云刺梨熟。虎來食。

蕨草。卽煇麻。其葉類麻。多毛刺。生灘落溪岸間。刈並豬鬣煮飼猪甚肥。沃湯浴體。可療瘋瘰。墨莊漫錄云。一種惡草。羅生於野。土人呼爲蕨麻。其枝葉拂人肌肉。卽成瘡。潰爛久不能愈。白香山詩。蕨草四時香。俗名火麻草。

前胡。遍生山谷間。春初吐葉。土人採爲菜。味極香。俗名羅鬼菜。又名姨媽菜。黔中婦女好遊。相識卽通往來。呼爲姨媽。飯則必設此。故名。

木芙蓉花。一日三變。由白而紅。至深紅。極豔。

女紅極精。繡蟒。不減于顧氏露香園者。

夾酒。初用醱燒酒法。再用釀白酒法。乃成。

哂酒。一名重陽酒。以九日貯米于甕而成。他日味劣。以草塞瓶頸。臨飲注水平口。以通節小竹。插草內吸之。視水容若干。徵飲量。苗人富者。以多釀此爲勝。

菜豆腐。入碎菜于豆汁成之。又一種。名連渣菜豆腐。又有苕灰豆腐。以苕梗燒灰罨過宿。食之極嫩。又有

磨芋豆腐。劇天南星磨漿。以石灰灰水點成。性寒質勁。能祛風化痰解煤毒。造者。每閉戶避人。有說鬼者。則不成矣。又名鬼芋豆腐。或云。卽藥品中土芋也。

黔人好食臭腐物。每歲三月。洗白菜。鋪巨桶中。加以小米。層菜層米。滿則以巨石壓之。至五月始開。氣極惡。沸湯食之。頗以爲美也。其汁治泄瀉痢疾甚効。土人呼齏菜。

貴陽竹枝詞三十首。作者不知誰何。擇錄數首。以志土風。最堪憑眺是東山。放着晴天好去頑。今日遊人定多少。倩郎幫妾理釵環。方言放着。巧趕現成之謂也。清明上冢近城隈。縞素衣裳淡粉腮。聽得阿誰憐少婦。汗巾揩淚首重迴。中秋月色最清佳。鑼鼓喧闐笑語譁。喬扮仙姬來送子。背兜兜個大倭瓜。妾轎迎來郎拜堂。郎忙去謝妾爹娘。合歡三日娘看妾。滿月回門妾伴郎。板凳條條坐綠鬟。孃孃廟看豫陞班。今朝比似昨朝好。拷火連場演下山。孃孃廟在指月堂。拷火下山。花戲也。

杜鈞。字景宋。號藕莊。江西新建人。以進士。爲雲南太和縣令。改易門。擢鎮雄牧。以事謫戍貴陽。能詩。漢軍劉永安。雲夢萬化成。大埔饒重慶。並以州縣罷。日相與吟詠。重慶作落花落葉詩八章。咸屬和。鈞成八十章。人傳誦之。

王覺蓮。字夢白。號醒齋。貴筑人。初覺蓮父母。嘗祈子於旌陽宮。同夢老嫗。手持折枝白蓮與之。乃生覺蓮。生而俊慧。父母異之。三四歲。指字與識。以多自喜。其父母欲其繼家業爲賈。至五歲。自請讀書。過目成誦。出語驚其師長。教之文藝詩詞。若素習者。共稱爲神童。其補諸生。中鄉試。未冠也。乾隆四年。成進士。選庶

吉士散館授編修數遷階父母皆受封以歿仕至詹事。

安南縣龍翔山一名巍山在縣東北五里山頂有洞洞中有天成石確石爐。

安南縣東哈馬關南老雅關極險峻外有盤江以爲固興義有魯溝卡爲南面之遠隘真天險之地而昔未有能守之者足見險不足恃。

安南學舍榜有欲飛二大字在巨石上明總兵鄭子龍所書莫忙亭亦子龍建。

庭間錄載吳逆在滇開科取士有中式某任雲南某州知州大堂署聯云皂隸排衙渾如一天星斗本州坐堂好似五帝朝天又顏其廢曰廢焚軒余往大定過鎮西衛城通衢有節婦坊新斲石爲之坊極高石柱大書深刻朱字聯云閱清冊數條憂憂乎人所難也披請題幾幅熙熙然衆皆悅之又於某城見武弁署其營門曰柳細風清。

黔西州署西偏有海棠一株老幹偃蹇人言花時極香軒亭位置亦佳州牧會稽陶廷淑有聯云名友冠羣芳未知杜老當年何獨無情不詠紅香飄四座若使淵材到此亦應有恨俱消。

安平道中過蘆荻哨數十家皆土娼其西五里有山象婦人坦腹下有竅東南有大石如人口口向之黔人用潮銀名吹絲炙以火則鉛出。

借短票銀市商謂之銃。

黔中婦女作背兜負兒於背每歲中秋夜以少年裝束如女子背瓜鼓吹送至親友牀上祝生子名曰送

瓜。

省中街市皆砌以石。雨後極滑。婦女雨行穿毛底襪。或用樓底最穩且快。

市人賺銀錢爲會。每月箍之團飲爲樂。曰上會。婦人亦多爲之。其始蓋皆各省流寓之民。鮮土著者。故釀銀寢以成俗。輕去其鄉。隨地遷異。上古淳質之世所不爲也。

豬肘呼曰胖。讀胖。上聲。平聲。煮爛曰色。讀怕。平聲。

酒一壺曰一棒。故呼酒壺曰棒。

夷人稱漢官曰大老黃。吏士曰小老黃。黔俗稱人皆曰公。老者曰老祖公。稱長隨曰二公。凡女皆曰婆。婦曰奶。曰太老者曰奶奶。老太其尤老者。老祖太。間稱婦女通曰老太。其大公二公三公大婆二婆三婆。則依次爲稱。小者曰么。曰滿。至稱女爲妹。則賤之矣。父母於兒亦不名。皆曰大爺二爺。以次呼。

男婦做客俱取席果糕餌之類。包裹攜回曰紫包。

凡他省人客黔娶妻生子名轉窩子。轉窩所生名鬥子。再傳則土人矣。轉讀去聲。江西人尤多。

凡妓所居。濫者曰塘子。潛藏者曰私門子。男女往來者曰做客。稱游妓亦曰客。俗稱最小者曰么婆。幼妓

爲小么。塘子多在阜角井三板橋。

省城東相寶山樓上有鏡。相傳能照前世。名照妖鏡。余於消夏時過寺見之。昏昏不能辨人媼妍。其厚二寸許。兩面皆有光。又有銅牛在佛座下。缺一耳。亦古物。疑二者當合爲一。然後可用。俗人誤置二處耳。

黔靈相寶樓霞諸山並有吳達善劉藻二制軍詩最佳余欲錄歸以行不果
張蓮濤有五禽言其辭一曰昨日雲陰今日雨零昨日山暗今日水深水深猶可泥滑滑愁煞我二曰吁
可怖山下路齒齒者石淫淫者霧東西上下無着處不如歸去三曰陂陀陂陀左崖右阿崎嶇逼仄可奈
何行不得也哥哥四曰山有草木巢居樂田有稻粱啄不餓得過且過五曰孔雀山雞炫毛自禍我藏其
美時至則可吁嗟鳳凰不如我

黔記卷二

包祚永字成美號存齋貴筑南上里陳家寨人自幼穎異力學能文年十四補諸生二十三登賢書雍正五年成進士改庶吉士累官廣東道監察御史性明慤不慕浮華切究民生利弊有意經世之業敦本務實遇事敢言乾隆初楚鹽騰貴官引不銷大臣會議祚永言應照兩粵官運官銷則私鹽可絕而價自平又言滇省銅廠收買正餘銅宜以辨銅庫本餘息銀酌量加其價值以卹廠民又言黔省苗狎頗能自衣其力而漢人惟資楚布歲需千億萬費兵民窮困職此之由請立法勸以紡織並言八旗婦女多工刺繡耗力而無益於用亦宜學習機杼以資生計又言古州新入版圖諸險要之地建立城汛安設屯軍而竄伏未遠之苗甚多深山窮谷畏罪逃刑雖從前猖獗難容其目下困窮可憫多傷失所咸切思歸但聞田土已別經領種村塢多改爲城堡向隅轉壑疑慮不前誠恐異日潰散有虞莫若此時招徠設法近經督臣張廣泗議凡已剿苗寨所有投撫苗衆酌其人口撥給土田歸并安插應再加詳酌務盡招出潛藏餘苗分配各寨漢三苗一俾漢苗雜居強弱相制卽實無土可給亦堪傭佃營生撫恩束法自可漸革獷凶以厚藩蔽並言滇省近開麗江普洱昭通東川等府州縣探夷信處須調兵防而地廣兵單調多額少督撫提鎮以糧餉歲資協濟而經費有定勢難議添竊思助兵之不足莫如留心團練素稱精悍夙著勤勞但團制若循舊而行必事難而累民亦甚惟有變通其法略無紛擾妨農不必設衛屯田不必集衆操演

諭以保固之要。免其奔應之繁。按州縣戶口多寡。每選壯健數百名。給予本省優免。註冊示勸。一逢地方有事。或令防守隘口。或令扞護城池。此不增餉添兵。可期內安外固。祇以向來團練。或統之武職。則遭官兵役使。弁員虐凌。或屬之文官。則又爲武職大員所脅制。謂當慎重其事。請於迤東迤西兩道。並加兵備。職銜以董率之。庶得文武和衷。遵奉惟謹。若遇調用出征。支糧賞卹。概與官兵一例。如此。則與戎政大有裨益。疏上。議如祚永言。七年二月。因前任貴州提學監察御史鄒一桂。條奏清丈黔省田畝。逐坵繪形編號。設由單以給業主。立官冊以杜訟端。其有丈出餘田。祇將原賦均攤。不必加增賦額。部議未上。祚永具疏爭之。其略曰。臣黔人也。備悉民俗。丈量一事。徒滋擾耳。他省且然。臣省尤甚。妄者之意。以爲黔田從無頃畝。不知歷來頃畝。未嘗不清。康熙元年五年八年。皆有開墾畝數。報官成賦。九年。經撫臣修鳳彩。請盡行清丈。定額升科。十一年。竣事。載入賦役全書。是黔省並無不丈之田。豈得如一桂所云。田地但計穀種。而無畝數之理。且謂丈量爲清訟而舉。攤賦不增。但無知愚民。易惑難曉。初聞清丈。已覺倉皇。繼見差官。尤生畏懼。彼窮鄉僻壤之間。保無有胥役乘機嚇詐。倡爲既丈之後。實欲加賦之言。因而臨丈之時。高下任意。行賄者將多報少。缺賂者以少作多。遂致富室勢紳。勾稽弗確。貧民夷戶。積算偏精。弊竇叢生。田畝益混。兼有奸猾頭人。串通衙蠹。暗折夫馬。明索酒殺。冊結紙張。巧造名目。或照煙戶。或依田畝。逐需挾派。共飽私囊。再或農隙之時。小民趁營生務。故於旬日之前。追集合村多人。行其苛索。候丈無期。以致廢時失業。卽有能員覺察。日久敗露。而閭閻受累已深。若夫編註繪形。發執由單之說。揆之黔省。更屬難行。夫

田界有定，坵形不常，黔民多貧，產業無幾，或有兄弟析居，將一坵分爲兩三，則由單不能各執，黔田多依山麓，故俗曰梯子田，或有夷高培低，合數坵而平爲一，則又與由單不符，其窮民典買，或有數坵一單，減半轉售，則由單又需分給，更換繳領，民則剝削貲財，官亦殫繁案牘，又其甚者，清丈田畝，則通省寸田尺土，俱當履隨親勘，而全黔上下游沿邊地界，接連滇粵湖南，半屬生蠻生苗，冥頑易駭，倍常拊循，遽加丈量，恐致滋事，在一桂謂立法務詳，意非不善，而臣竊總總慮，誠見黔省乃刀耕火耨之鄉，素稱瘠薄，苗蠻雜處，當思因地制宜，使果用無定畝，卽不緣民間爭訟，亦必徹底清查，若久料畝升科，又不得一二競爭，輒至累及通省，應令督撫將從前業經丈清，現在按則起科者，概免丈量，其有近年開墾，實在未丈之田，各令地方官查明轉報，以憑清丈，分別辦理，則黔省民苗感戴萬世矣。疏入，部議如祥永言，從之。尋以病乞歸，授徒里閭，主講貴山書院數年，勵諸生以純樸之學，家庭謹飭，操行如寒素，冬戴皮冠，舊矣，鄴見處，以青布綴之，牋紙破補，以卷牘廢餘，其節儉如此。年六十有八而卒，子必明，雍正十三年舉人，官武寧知縣，曾孫錦榮，乾隆五十四年，以郡籍，中鄉試第一名，錦榮先其兄一年，亦以郡籍中式，嗣裔多守家學，入郡邑庠者，祥永卒後，所親官奉天歸，謂奉天有包御史祠，蓋祥永嘗因公辦事其地，吏民建以報功德云。

張仙，一字元元，俗名仲猷，號三丰，又號斗蓬，又呼邀遏仙，閩縣人，又云羊城人，廣州志云，留侯後裔，七歲能基，人無敵者，十歲習儒業，有小婢饋魚於塾，爲同業者棄去，而仙不知，歸誑婢，婢緝，遂入山學道，遊歛

州值歲旱從者死遇二老人遺之餌乃得活乃入番家華林三十年出山渡流沙禮邱長春歸未至閩途遇鄭思遠授以道鄭謂曰一魚之事子必往了俗緣也歸閩補刑曹吏辟囚越獄連坐戌夜郎至平越與千戶張信交信不勝信忽夢老嫗授子法乃勝仙大笑曰驪山老嫗大饒舌後授信葬地曰十年後位至封侯既而果然明史載三丰遼東懿州人名全又名君寶又天順年三丰有自具供狀稱冀州遼陽人遼冀相近閩則遠矣或寄居之地與

明陸燦高真觀禮斗亭碑文曰平越之地因山爲城有老氏之宮曰高真觀據其西南隅在昔仙人張三丰栖遯於斯作亭以禮斗焉先生既超離人羣還居大清元蹤日邈遺構遂泯惟先生之道廣大神明形骸外垢天機內朗若夫遐襟曠識卓爾物表雖萬乘傾想躡景追聲而隱見猶龍終莫羈致蓋軒后詡下風之從廣成堅南首之臥未足以喻也當其寓形域中此焉遊息扳揖斗極與相周旋時則斯亭者固靈輿之所降觀百神之所萃集矣而翦焉墜落鞠爲茂草令仙聖臨輒而歎歎龍鶴迴翔而不下元學之士無以繫其懸慕斯非吾徒之責與燦雖僑寄是邦心存高範矧瞻廢址慨然興壞於是屬其觀之黃冠師馬崇禮倖經理焉而率諸同志者助其費數月亭成道俗環囑咸共歡喜議鑄於亭以示無極迺稽首階前勉爲之銘其辭曰嶢峨之山形穹隆兮虬螭結蟠鳳臨江兮扶輿宛延靈淑鍾兮言言元宮直崇墉兮亭宇密清檄斗中兮至人天遊此從容兮澄心儲精與神通兮清夜霽然星與降兮魁旋杓回玉衡度兮遺墟寂寥厥構仆兮百年於茲復其故兮棟桴高驪梵檠布兮神居祕闕燦然覩兮鸞鳥騰告列仙赴兮